

Ilanga Lokufundela Phezulu



nalibali
ITHOMA
NGENDATJANA.

LabakwaNal'ibali

Iminyaka yekuthomeni !

Umnyaka lo sithanda ukumema imindeni nabatlhogomeli babantwana abancani bona bafunde nathi ngeLanga Lokufundela Phezulu, ngomhlaka 7 Febheribari 2024 – nangawo woke amalanga. Indaba yethu ekhethekileko ethi, Ukatswana olahlekileko, itlolwe nguStacey Fru begodu imigadangiso nguRico. Indatjana le ifumaneka ngamalimi asemthethweni ali-11 weSewula Afrika. Ikarada lendabeli ngelakho ngokukhethekileko!



Ngaphambi Kwelanga Lokufundela Phezulu

- Yazi kuhle indaba ukwenzela bona ukghone ukuyibuyelela namkha uyifundele phezulu ngendlelakho.
- Cabanga ngokuthi ungayenza njani indaba le bona iphile. Khetha ukuthi buzokuba njani ubujamo bakho bobuso nokuthi uzowusikinya njani umzimba.
- Khetha isikhathi sokucoca indatjana lapho woke umndenakho ukhona.
- Fumana iingcenge endabeni lapho abantwana bakho bangangenela khona, ngokwesibonelo bangenza amatjhada enziwa ngukatswana nenja.
- Phrakthisa ukucoca namkha ukufundela indaba phezulu.



Ngaphambi kobana ufundele indaba phezulu

- Sika iinthombe zeenlwanyana ezifuywako njengezinja, abokatsu, imiqasa nabokghuru. Vumela umntwana ngamunye akhethe isithombe azosibamba njengesilwanakho esifuywako njengombana ufunda indaba.
- Buza imibuzo namkha khuluma ngezinto ezizokusiza abantwana bakho badzimelelise umkhumbulwabo endabeni. Ngokwesibonelo, veza isithombe sakakatsu namkha ukatswana. Khuluma ngeelwanyana esingazifuya.
- Funda isihloko sendaba. Buza, "Nicabanga bona indaba le ikhuluma ngani?"



Njengombana ufundela indaba phezulu

- Njengombana ufunda indaba, buza abantwana bakho imibuzo ephathelene nayo. Imibuzo efana nethi, "Ucabanga bona kubayini enze lokhu?" nothi "Wena bewuzokwenzani?" ithuthukisa izwelo lomntwana nendlela azwisisa ngayo abanye abantu.
- Yenza abantwana bakho bangenele ngokuthi benze amatjhada enziwa ziinlwanyana.



Funga ukuthi nizokufundela phezulu njengomndeni ngeLanga Lephasi Lokufundela Phezulu – naqobe ilanga. Tlolisa ku-www.nalibali.org namkha thumela igama elithi "WRAD" ngeWhatsApp ku - 0600 44 22 54. Umndeni omunye nomunye otlolisako uzokufumana ithuba lokuhlanganyela neNal'ibali ekhambweni lokufunda ngemindeni ngeLanga Lephasi Lokufundela Phezulu labakwaNal'ibali. Nizokufumana neendatjana ezingeziweko nezinye iindlela zokufunda nabantwana benu unyaka woke.

Ukatswana olahlekileko



Indaba ngoStacey Fru ☉ Imidwebo ngoRico



NgeLesihlanu ntambama, uNeo noBella bebadlala esivandeni sakaNeo. UNoodle bekazilalele ngokuthula.



Myewuu, myewuu, ~~myewuu~~ Ukatswana omncazana otjhedlana selananaba aphuma ngaphasi kwehlatjhana.


“Qala, unebhande elihle elihlaza kwesibhakabhaka entanyenakhe,” kutjho uNeo.

UNeo noBella bamngenisa ngendlini.

“Mma, Baba, qalani! Sifumene ukatswana esivandeni!” kurhuwelela uNeo.

“Ngewomuntu othileko ngombana unebhande elihlaza kwesibhakabhaka entanyenakhe,” kutjho uBella.

“Kuzokufuze silinge ukufumana umnikazi” kutjho uBaba.



“Kusasa singenza amaphosta wakakatswana olahlekileko. Mhlamunye umnikazi uzowabona,” kutjho uMma.

UNeo wafumana ibhoksi lamanyathelo nejezi edala bona enzele ukatswana umbhede omtofotofo. Ubaba wamupha ukudla wamnikela namanzi ahlanzekileko ngesikotilelo esikhulu.




NgoMgqibelo ekuseni, uBella wafika ekuseni khulu. “Asenzeni amaphosta,” kutjho uBella.
Benze amaphosta amane. UBaba wathi, “Asikhambeni siyowaphanyeka.”
Kokuthoma baya ebulungelweni leencwadi ...



ngemva kwalokho baya esitolo...



bese umakhelwana wabavumela
bona baphanyeke iphosta
eyegeni yakwakhe.




Batjiya iphosta yinge bona bayoyiphanyeka esikolweni.

Kwathi ngeLesibili ntambama, uNeo,
uBella, uNoodle nokatswana bebadlala
ngekumbeni yokuphumula.

Ko ko ko! Bekunomuntu emnyango.

UNoodle wakhonkotha athabile.

Ukatswana wathukwa wagijima
wayozifihla ngaphasi kwesofa.



“Eh, lotjha,” kutjho uNeo nakabona umntazana ajame emnyango.

“Lotjha, igama lami nginguGina,” kutjho umntazana. “Ngicabanga
bona ukatswana enimfumeneko kungenzeka ngewami. Igama
lakhe nguGinger.”

Kodwana kuthe lokha nabangena ngekumbeni yokuphumula,
ukatswana bekangekho. “Yoo!” kutjho uBella. “Ngithemba bona
ukatswana akakalahleki godu!”

UGina wabonakala atshwenyeka khulu.

Kusese njalo bezwa uNoodle ngekhwitjhini. *Woov, woov!*
Kwalandela itjhada elikhulu **LOKUWA!**





Abantwana bagijimela ngekhwitjhini. Nanguya ukatswana. Uketule isitja sakhe samanzi lokha uNoodle nakakhonkothako nje sele amanzi komhlolo.

UBella wamomisa wamnikela uGina.

Phurr, phurr, phurr. Ukatswana bekathabe khulu!

“Bella nawe Neo nivumelekile bona ningeza nizokuvakatjhela uGinger nanyana kunini nanifunako.”

Ubuso bakaBella bathoma ukutjhaphuluka. Wathi, “Ngiyathokoza!”

“Kodwana,” kutjho uNeo, “Ngicabanga bona uNoodle uzokusala ekhayapha.”

Boke bavumelana ukuthi lo mbono omuhle khulu.



Ngemva kokufunda indaba ndawonye, khulumani ngokuthi kwenzekeni endabeni. Buza imibuzo evulekileko ezokukhuthaza umntwanakho bona acabange begodu akhulume ngemibono ekhambisana nendaba, ngokwesibonelo, “Ngiyiphi ingcenge oyithandako endabeni?”

Yenza indaba le ibemnandi!

- 🐾 Vuma ingoma namkha utlame ingoma ekhuluma ngabokatsu nezinja.
- 🐾 Dweba isithombe sengcenge oyithandako endabeni le.
- 🐾 Sebenzisa ibumba lokudlala bona ubumbe uGinger noNoodle.
- 🐾 Yenza iphosta yesilwanakho esifuywako namkha isilwana esifuywako ongathabela ukuba naso. Dweba isithombe sesilwanakho esifuywako. Tlola namkha ubawe omunye akusize utlole umbala negama lesilwanakho esifuywako.



Yabelana ngeenthombe namavidiyo wakho nabantwana bakho nithabela indaba yeLanga Lephasi Lokufundela Phezulu neminye imidlalo [#nalibaliwrad2024](#) ehlelweni lethu lezokuthintana!sosiële media!

TheNalibaliChannel

nalibaliSA

@nalibaliSA

@nalibalisa

@nalibalisa

nalibalisa

The Nal'ibali Trust

+27 64 801 5496

Nal'ibali (ligama lesiXhosa elitjho ukuthi “nasi indaba”) lijima leentjhaba zoke lokufunda bona uzithabise. Umnqophwethu kukwenza woke umntwana athabele ukufunda indatjana qobe langa eSewula Afrika.



IsiNdebele